

Evening Dogri (NSD) Bulletin 07-09-2024

आकाशवाणी

खास खास खबरां ...

- 1 केन्द्री गृहमंत्री अमित शाह होरें भरोसा दोआ जे केन्द्र शासत प्रदेश जम्मू कश्मीर गी विधानसभा चुनाएं दे मगरा ओहदे राज्य दा दर्जा ब्हाल कीता जाग।
- 2 जम्मू कश्मीर च विधानसभा चुनाएं दे दुए गेड़ लेई 267 नामांकन मंजूर कीते गे न।
- 3 उपराष्ट्रपति जगदीप धनखड़ होरें उत्तर प्रदेश दे गौरखपुर च नमें सैनिक स्कूल दा उद्घाटन कीता।
- 4 केन्द्रीय स्वास्थ्य मंत्री जे.पी.नड्डा होरें पटना च हाई-टेक पटना मैडिकल कालेज ते अस्पताल दे निर्माण कम्में दी प्रगति दी समीक्षा कीती।
- 5 राष्ट्रपति द्रौपदी मुर्मू, प्रधानमंत्री नरेन्द्र मोदी होरें गणेश चतुर्थी दे मौके पर लोकें गी बधाई दित्ती।
- 6 भारतीय मौसम विभाग नै ओडिशा, तटीय आंध्रप्रदेश ते तेलंगाना च औंदे चऊं दिनें दरान होर बरखा पौने दी भविक्खवाणी कीती ऐ।

<><><><><><>

JK-Amit Shah

भारतीय जनता पार्टी दे वरिष्ठ नेता ते केन्द्री गृहमंत्री अमित शाह होरें एह आश्वासन दित्ता ऐ जे विधानसभा चुनाएं दे बाद जम्मू कश्मीर गी परतियै राज्य दा दर्जा दित्ता जाग। इक लोक बैठक गी संबोधत करदे होई उनें आखेआ जे औने आले चुनां जम्मू कश्मीर लेई बड़े इतिहासक न की जे पैहली बारी दफा 370 दे शकंजे शा बाहर रेइयै समूलचे केन्द्र शासत प्रदेश च राष्ट्री झंडे ते संविधान

कन्नै इत्थें चुनां होआरदे न। शाह होरें कांग्रेस ते नैशनल कांफ्रेंस दे गठबंधन गी परानी प्रणाली गी परतियै आन्नने दे जतनें पर बी अरोप लाया। उनें गलाया जे जम्मू कश्मीर च परतियै आतंकवाद फैलाने आस्तै लग्गी दियां न। सरकारै इत्थें जम्मू कश्मीर च आतंकवादी गतिविधिएं 70 फीसदी तगर घटाई दित्ते दा ऐ। उनें एह बी गलाया जे एनडीए सरकार कदें बी इनें गतिविधिएं गी वापस नेई आन्नन देग ते नां गै गुज्जर-बक्करवाल जां दलित समाजै कन्नै अनयाय होन देग की जे इनें समुदाएं गी बीजेपी सरकारै हेठ आरक्षण थोआ ऐ। गृहमंत्री होरें जम्मू च दऊं दिनें दे दौरे पर आए दे न। ओह बीजेपी दे चुनां अभियान गी बढ़ावा देने आस्तै आए दे न। एह चुनां त्रऊं गेड़ें च होंगन जेहदा पैहला गेड़ 18 सितम्बर गी ऐ। कल गृहमंत्री होरें पार्टी दे लीडरें कन्नै गल्लबात कीती ते चुनावी घोषणा पत्र दा निवारण कीता।

<><><><><><>

Nominations

जम्मू कश्मीर च दुए गेड़ दे असैंबली चुनाएं लेई मेदवारें आस्सेआ दाखल नामजदगी आले कागदें-पत्रें दी जांच दे बाद 267 नामजदगिएं गी दरूस्त पाया गेआ ऐ जिसलै के 62 नामजदगियां खारज बी करी दित्तियां गेइयां न। आकाशवाणी दे जम्मू संवाददाता मूजब जम्मू संभाग दे 3 जिलें ते कश्मीर घाटी दे बी त्र जिलें-यानि प्रदेश दे कुल 6एं जिलें दे 26 असैंबली हल्कें लेई कुल 329 नामांकन हासल होए हे। नामांकन दाखल करने दी खीरी तरीक 5 सितम्बर ही ते मेदवार औंदे सोमवार तगर अपने नामांकन परताई सकदे न। इस गेड़ लेई मतदान 25 सितम्बर गी होग। प्रदेश च चुनाएं दी तरीक नेड़े औने दे कन्नै गै सियासी गतिविधियां बी तेज होई गेइयां न ते मेदवार ते स्टार प्रचारक मतदाताएं गी अपने पक्ख च करने लेई रैलियां ते जलसे करै करदे न।

<><><><><><>

Congress Charge Sheet

जम्मू कश्मीर च असैंबली चुनाएं शा पैहले कांग्रेस पार्टी नै इक आरोप पत्र जारी कीता ऐ जेहदे च बीजेपी पर कथित तौर पर प्रदेश दे लोकें दी अवाज दबाने दा आरोप लाया गेआ ऐ। कांग्रेस दे महासचिव जयराम रमेश होरें सोशल मीडिया मंच एक्स पर एह आरोप पत्र सांझा कीता जेहदे च आखेआ गेआ ऐ जे केन्द्र सरकार नै लोकें आस्सेआ नेई चुने गेदे इक लेफ्टिनेंट गवर्नर गी जम्मू कश्मीर च नियुक्त कीते दा ऐ ते उसी सब्बै अख्तियार देई दित्ते दे न। इस दस्तावेज च एह दावा बन्नेआ गेदा ऐ जे जम्मू कश्मीर च लोकें दी अवाज गी दबाया जा'रदा ऐ ते वायदें दे बावजूद बी प्रदेश दे लोकें गी राज्य दा दर्जा वापस नेई दित्ता जा करदा ऐ ते उंदे नै दुए दर्जे दे नागरिकें आला लेखा बवहार कीता जा'रदा ऐ। कांग्रेस नै एह बी दावा कीता ऐ जे जम्मू कश्मीर च जमीनें, संसाधनें ते नौकरिणं दी बंड बाहरै दे लोकें गी कीती जा'रदी ऐ जिसलै के मकामी लोकें गी मेंहगाई, बड़े मते टैक्सें, पानी दी कमी, बिजली दी माड़ी सप्लाई ते स्मार्ट मीटरें राएं बड़े मते बिलें दी मार झल्लनी पवै करदी ऐ। कांग्रेस नै दोष लाया ऐ जे मुख्य च सब्बने शा मती बेरोजगारी दी दर दे मामले च जम्मू कश्मीर दुए नंबरै पर ऐ।

<><><><><><>

Vice President

उपराष्ट्रपति जगदीप धनखड़ होरें अज्ज उत्तर प्रदेश दे गौरखपुर च सैनिक स्कूल दा उदघाटन कीता। इस मौके पर उपराष्ट्रपति होरें आखेआ जे शिक्षा च बदलाव आन्नने दा इक सशक्त जरिया ऐ जेहड़ा समाज थमां बुराइं ते कुरीतिणं गी खत्म करदा ऐं उपराष्ट्रपति होरें आखेआ जे उनें गौरखपुर सैनिक स्कूल च आइयै खुशी होआ'रदी ऐ की जे ओह आपूं सैनिक स्कूल चितोड़गढ़ दे विद्यार्थी न। उपराष्ट्रपति होरें नमें बनाए गेदे इस स्कूल दे बुनियादी ढांचे दी बढेयाई करदे होई आखेआ जे इस सैनिक स्कूल च क्षेष्ठ सुविधां जेड़ियां देसा दे दुए सैनिक

स्कूलें लेई इक मिसाल न। उनें छात्रें गी आखेआ जे ओह नाकामियां थमां नेई डरन की जे एह कामयाबी दी शुरूआत ऐ।

<><><><><><>

Bihar

केन्द्र स्वास्थ्य मंत्री जे.पी.नड्डा होरें अज्ज पटना दे हाई टैक पटना मैडिकल कालेज ते अस्पताल च निर्माण कम्में दी प्रगति दी समीक्षा कीती जेहड़ा दुनिया दे दुए बड्डे अस्पताल दे तौरा पर विकसित कीता जा'रदा ऐ। केन्द्र सरकार बिहार गी सुपर-स्पेशलिटी सुविधाएं कन्नै 54 सौ शा मते बिस्तरें आले अस्पताल दे विकास लेई मदद करा'रदी ऐ। श्री नड्डा होर दरभंगा ते मुज्जफरपुर च बी दो सुपर-स्पेशलिटी अस्पतालें दा उद्घाटन करने दे कन्नै उनेंगी लोकें गी समर्पित करगंन। ओह एम्स दरभंगा लेई शोभान एकमी बाईपास पर साइट दा दौरा करगंन। जेहदे लेई केन्द्र नै इक नमीं बजेंसी नियुक्त कीती ऐ। अज्ज मंत्री हुंदे बिहार दौरे दा खीरी दिन ऐ। एहदे थमां पैहले कल ओह पटना पुज्जे हे। एहदे गिमां पैहले नड्डा होरें पटना स्थित तख्त श्री हरि मंदर साहब दा दौरा कीता ते उत्थें मत्था टेकेआ। बीजेपी अध्यक्ष होरें पराने पटना दे खजेकालन घाट पर बिहार बीजेपी दी सदस्यता अभियान च बी हिस्सा लैता। बिहार बीजेपी नै राज्य च अगले दऊं म्हीने च इक करोड़ नमें सदस्यें गी जोड़ने दा लक्ष्य तैह कीता ऐ।

<><><><><><>

Jharkand

झारखंड सरकारै राज्य च वकीलें लेई 5 लक्ख रपे दी मैडिकल बीमा मुहैया करोआने दा फैसला लैता ऐ। एहदे कन्नै राज्य दे तकरीबन 30 ज्हार वकीलें गी फायदा थहोने दी मेद ऐ। एह फैसला मुख्मन्त्री हेमंत सोरेन हुंदी प्रधानता च लग्गी दी कैबिनेट बैठक च लैता गोआ। कैबिनेट नै 65एं ब'रें ते ओहदे शा मती

उमरी दे वकीलें दी पैशन गी 7 जहार थमां हर म्हीने 14 जहार रपे तगर बधाने दे प्रसताह गी बी मंजूरी देई दित्ती ऐ।



PIB

प्रेस सूचना ब्यूरो पीआईबी दी असलियत दी पड़ताल सरबंधी नै बीएसएनएल दी अधिकारिक वैबसाइट दी नकल करियै निजी ब्यौरा मंगने आली इक धोखाधड़ी आली वैबसाइट खलाफ खबरदार कीता ऐ। असलियत दा पता लाने आली इकाई नै आखेआ ऐ जे फर्जी वैबसाइट “bsnl tower india.com” धोखेबाजी कन्नै 5 जी टॉवर लाने लेई दरखास्तें लेई साददा देआ’रदी ऐ। पीआईबी नै पाया ऐ जे वैब पता बीएसएनएल कन्नै जुड़े दा नेई ऐ ते लोकें गी खबरदार कीता ऐ जे ओह इस चाल्ली दी संदिग्ध वैबसाइटें पर निजी ब्यौरे सांझे करन। बीएसएनएल दी अधिकारिक वैबसाइट ऐ BSNL.com.in।



Ganesh Chaturthi

गणेश चतुर्थी दा ध्यार अज्ज पूरे देश च धार्मिक श्रद्धा ते उत्साह कन्नै मनाया जा’रदा ऐ। एह ध्याड़ा भगवान गणेश ज्ञान, समृद्धि ते सोभाग्य दे प्रतीक न। विनायक चतुर्थी जां गणेश चतुर्थी 10एं दिनें तगर चलने आले उत्सव दी शुरूआत ऐ, जिस दरान लोक अपने घरें च भगवान गणेश हुंदी मिट्ठी दियां मूर्तियां विराजमान करदे न ते उंदी पूजा करदे न। एह ध्यार महाराष्ट्र च खास तौरे पर मनाया जंदा ऐ, एत्थें दे लोक इस ध्याड़े गी बड़े गै उल्लास कन्ने मनांदे न। राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेन्द्र मोदी होरें बी इस ध्यार लेई मुख भरै दे लोकें गी शुभकामनां दित्तियां।



Pak Militant

पाकिस्तान दे खैबर पख्तूनख्वा खित्ते च सुरक्षाबलें सैन्य मुख्यालय पर कीते गे हमले गी नाकाम करने दरान 4 आत्मघाती हमलावरें गी मारी मकाया ऐ। सेना मताबक एह घटना उस समें पेश आई। जिल्ले मोहम्मद जिले च चार आतंकवादिएं अर्धसैनिक फ्रंटियर कोर मुख्यालय पर हमला कीता।



West Bengal

पच्छिम बंगाल दे गवर्नर सी.वी.आनंदा बोस होरें अपराजीता वूमन एंड चाईल्ड (वैस्ट बंगाल क्रिमिनल लॉ एमेंडमेंट) बिल 2024 गी एहदे च केई खामिएं गी दिखदे होई इसी राष्ट्रपति द्रौपदी मुर्मू होरें गी भेजेआ ऐ। पिछले म्हीने दी 9 तरीक गी कोलकाता दे आर.जी.कर अस्पताल च इक सिखलाइ प्राप्त करा'रदी डाक्टर कन्ने दुष्कर्म ते हत्या दे मगरा इक बिल गी राज्य विधानसभा च पास कीता गेआ हा। बिल च दुष्कर्म दे दोषी लोकें गी फांसी दी सजा मंगने दी मंग कीती गई ऐ। जेकर उंदी इस माड़ी कारकरदगी च पीड़ित दी मौत होई जंदी ऐ जां उसी गंभीर हालत च छोड़ी दित्ता जंदा ऐ। गवर्नर होरें कल संजा सोश मीडिया पर इक पोस्ट च आखेआ जे बिल जल्दबाजी च तैआर कीता गेआ ऐ। उनें बिल दे कन्नै तकनीकी रिपोर्ट नेई भेजने लेई राज्य सचिवालय गी बी जिम्मेवार ठैहराया ऐ ते आखेआ जे एह उंदी भेठा दी कोताही रेई ऐ। आर.जी.कर मुद्दे दा जिक्र करदे होई गवर्नर होरें आखेआ जे राज्य सरकार दा फर्ज ऐ जे ओह बिल दा इंतजार कीते बगैर पीड़ित दे परोआर गी न्यांह दोआने गी जकीनी बनाह।



IMD

मौसम विभाग नै ओडिशा तटीय आंध्रप्रदेश ते तेलंगाना च अगले चऊं ध्याडे तगर मूसलाधार बरखा पौने दी संभावना जताई ऐ। विभाग दे मताबक तटीय आंध्रप्रदेश ते यनम च कल तेज बरखा बरी सकदी ऐ। मौसम विभाग नै अज्ज पूर्वी राजस्थान च ते अगले त्रऊं दिनें च तेलंगाना, ओडिशा ते मध्य महाराष्ट्र च मती मूसलाधार बरखा दी संभावना बुज्जी ऐं इस दरान अज्ज पच्छमी उत्तर प्रदेश, हरियाणा, पच्छमी राजस्थान, उत्तराखंड, गुजरात, छत्तीसगढ़ , कोंण ते गोवा च तेज बरखा बरने दे आसार बने दे न। पूर्वोत्तर भारत च बी अगले 7एं दिनें तगर नेह् गै हालात बने रौंहगन। मौसम विभाग नै 9 सितम्बर तगर केरल, माहे, दक्खन आंतरिक कर्नाटक ते तटीय कर्नाटक दे कन्नै-कन्नै अगले 7एं दिनें दरान मध्यप्रदेश च बी उस्सै चाल्ली दे हालात बने रौहने दी आशंका जताई ऐ। हपते दरान दिल्ली दे आले दुआले दे किश हिस्सें च दरम्यानी बरखा होई सकदी ऐ।

<><><><><><>